



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com



TAPAK 7

### Election duty lemsüker ajaki Covid vaccine agitsüla: EC

VOL. XVIII NO. 134 (ADOK 134) DIMAPUR

KÜPTOKNÜ (SATURDAY)

TSÜKLAI (FEBRUARY) 27, 2021 ₹ 5.00



TAPAK 10

### Yusuf Pathan cricket asaya nungi anener

## COVID-19 Nagaland: Nisung 9 dang anepaludar

**Kohima, February 26 (TYO):** Hokolbarnü Nagaland nung nisung ka dak danga COVID-19 aliba meputet aser nisung 4 taneptsü angu. Tang parnok nisung 9 anepaludar.

"Tanü nisung shinga dak-a COVID-19 meputet. Külen nisung 4 taneptsü nguogo. Parnokji Kohima nungi 3 aser Dimapur nungi 1 lir" ta Health & Family Welfare Minister, S Pangnyu Phom-i metetdaksü.

Nisung 12,198 rongnungi 11,946 taneptsü nguogo, ta paisa ashi.

Nagaland nung taneptsü angurji 97.93% lir, ta Health &

Family Welfare Director, Dr Denis Hangsing-ia COVID-19 bulletin nung ashi.

Nagaland nung COVID-19 puteter nisung 91 asü saka parnok 10 bo tanga timtem ajanga asü. Maneni, nisung 152 tashi tanga state temi ogo, ta paisa metetdaksü.

"Tanü tashi nung Nagaland nung COVID-19 alitsü akok ta temolung melema bilemba sample 1,29,926 tendangogo. RT-PCR ajanga sample 74,710, TrueNat ajanga 37,344 aser Rapid Antigen Test ajanga 17,872 tendang" ta Dr Hangsing-isa ashi.

## Mon nung medical college yanglutsü atema lung azüngtsüogo



February 26, 2021 nü Mon Medical College indang lung azüngtsüdang Union Health & Family Welfare Minister Dr. Harsh Vardhan, Nagaland Chief Minister Neiphu Rio aser tangartem agiba noksa angur. (Mon, February 26)

## March 27 nungi elections tenzüksü: ECI

**New Delhi, February 26 (Agencies):** Tamil Nadu, Kerala, West Bengal, Assam aser Puducherry nung March 27, 2021 nungi elections agitsü aser May 2 nü votes azüngtsü ta Election Commission of India-i Hokolbarnü metetdaksüogo.

West Bengal nung March 27, 2021 nungi tenzükter shilem 8 lemsar assembly election agitsü.

Assam nunga March 27 nungi shilem asem lemsar agitsü aser Tamil Nadu, Puducherry o Kerala nungbo April 6 nü election agitsü, ta ECI-i metetdaksüogo.

West Bengal nung assembly menden 294, Tamil Nadu nung menden 234, Kerala nung menden 140, Assam nung menden 126 aser Union Territory of Puducherry nung menden 30 lir atema election agitsü.

## Nagaland nung Bharat Vyapar bandh takok ngua agiogo



**Dimapur, February 26 (TYO):** Confederation of All India Traders (CAIT)-i Goods & Services Tax rules anema Bharat Vyapar bandh ayongba Dimapur nunga takok ngua agiogo.

Tanü Dimapur nung shishilembadak ajak shibang aser commercial vehicles mesenzü. Ajsüüaka, shisaliok rejutem, bank

asere office tembo akhi ama lapokogo.

"Nagaland kübok district 11 nung Bharat Vyapar bandh takok ngua agiogo aser iba mokdangba mapang mataloktsü atalokba osang kecha mali," ta Dimapur Chamber of Commerce and Industries President, Akashe Zhimomi-i ashi.

## Dimapur Airport nung 'air cargo operation' tenzüksü

**Dimapur, February 26 (TYO):** Dimapur Airport nung air cargo operation facility tenzüksü aser iba ajanga Nagaland nung aluyimertem kanga ajangzüksü.

Air cargo operation facility ajanga aluyimertemi linük kübok tesem balalai mapang shitak nung aonsotsü aser nungdakbatem belentetsü.

Dimapur Airport indang terminal building nungi domestic cargo operation inyaksü atema Director General, Bureau of Civil

Aviation Security, Ministry of Civil of Aviation, Govt of India-i molunga agizükogo.

"Ministry den kanga meranga jembia aruba sülen Dimapur Airport-i cargo operation tenzüksü temelaba nguogo. Airport nung common user domestic cargo terminal yangluogo aser kobi meli ibaji lapoktsü" ta Airport Authority of India, Dimapur Airport Director, M Zhimo-i osangbener dang ashi. (Maneni tapak 9 nung...)

**Kohima, February 26 (TYO):** Hokolbarnü Union Health & Family Welfare Minister Dr Harsh Vardhan-i District Hospital, Mon nung Nagaland indang medical college tanabuba yanglutsü lung azüngtsüogo.

"Prime Minister Narendra Modi lenisüba kübok taruba küm ishika tsüngda Northeast nung mapa tajung aika inyaksü" ta tanü Dr Vardhan-i ashi.

"Prime Minister Modi-i Northeast nung atema kanga bilemer aser senden amenba shia North East region renloktdaksütsü indang onüktem benoka jembir. Tanü iba lung azüngba ajanga Centre-i linük nung tangar memenepi alirtem atema bilemetsüba kuli sayur" ta paisa metetdaksü.

Linük nung medical college 562 lir aser iba nungi government sector nung 286 aser private

sector nung 276 lir, ta paisa ashi.

"Maneni, medical colleges 175 teyangludak lir. Linük nung medical commissions aika tentetogo health & wellness centres 1,50,000 shi ka lapoktsü" ta Union Minister-isa metetdaksü.

Linük nung healthcare workers-i COVID-19 anema mapa tajung inyakba atema tenüngsang agütsür. Iba wara anema raraba nung India ya developed countries aika dang nungi tajungba lir, ta paisa shisem.

Dr Vardhan-isa Centre-i tenzükba Ayushman Bharat programme aser 2025 tashi nung India nung Tuberculosis samatsütsü atema mapa inyakba osang lemsatetp.

"Küm 5 nungi 6 tsüngda Centre-i MBBS menden 50,000 nungi 80,000 kümstüogo aser

Post Graduate menden 20,000 talila ajungketogo. Health and Wellness Centres (HWC) 1,50,000 shi yangluba nung Nagaland nunga HCWs 370 yangludar" ta paisa metetdaksü.

Paisa state sorkar aser nübertem dang Ayushman Bharat kübok sensaker ajak tenüng zülüoktsü ayongzük. Centre-i Nagaland aser North East nung dang nangzükba ya tebang agi dang masü saka chichiba aser aria bilema nangzükter ta ashi.

Iba sentong nung Chief Minister Neiphu Rio-i "Iba medical college yagi Mon aser Nagaland nung alirtem dang masü saka Assam o Arunachal Pradesh state tem den Myanmar nung alirtem dena ajangzüksü. Iba college ya Public Private Partnership mode kübok state sorkari ketdangsüa repringtsü" ta ashi.

(Maneni tapak 2 nung...)

## Nagaland Congress-i Naga yimten latettsü mepishir

**Kohima, February 26 (TYO):** Hokolbarnü Nagaland Pradesh Congress Committee (NPCC)-i India sorkar dang Naga yimten teloktem den olemtep tembanger süra yimten latettsüla ta mepishia metetdaksüogo.

Tanü Congress Bhavan nung NPCC Extended Executive Committee senden amendang onük 6 bangzüngtepba sülen iba osang ya metetdaksü.

"Nagaland Governor aser Centre indang Interlocutor for Naga peace talks RN Ravi-i State Assembly nung olemtep tembangogo ta sangoktsüogo aser iba jagi onoki India sorkar dang mepshitsü lemet" ta K Therie-i ashi.

India sorkar aser Naga yimten teloktemi "One Solution" atema jembiteptsü Assembly-i

bangzüngtepba aitsür, ta paisa metetdaksü.

"Nagaland Governor-i olemtep tembangogo ta ashir nung kodaser State Assembly-i maneni olemteptsü jembir? Olemtep tembangogo aser iba nung sendaktepa alir ajaki telemtetba agitsüla ta molunga agizükogo, anungji India sorkari tekaratiba nung telemtetba agitsüla" ta K Therie-isa ashi.

India sorkari Nagaland nung alirtem nem kuli agütsütsüla. Olemtep tembanger süra, telemtetba ka agitsüla. District 12 nungi Congress lenirtemi tekaratiba nung telemtetba agitsüka ta bangzüngtepogo. Külen, Naga kin 14, Nagaland Gaon Burahs Federation aser tongtipang NGO temi ajaki agizükttetsüla telemtetba agitsü

shiogo, ta Therie-isa metetdaksü.

"NSCN(IM) den Framework Agreement aser Naga National Political Groups 7 den Agreed Position nung sign sütepogo. Tesüüba küm 24 tashi olemtepa arudang Adino Phizo-i aniba Naga National Council dak alaka tanga telok ajak denogo" ta paisa shisem.

"Prime Minister Narendra Modi-i August 2015 nung Framework Agreement sign asüba sülen Naga yimten tebilemetsü angatettepogo ta metetdaksü. Külen, September 2019 nung parnoki October 31, 2019 nü olemtep tembangtsü ta ashi. Naga nung den kwiben tiyazü jembitsü mesüra ashioktsütsü?" ta Therie-isa asüngdang. (Maneni tapak 2 nung...)

## C-Edge College nung Faculty & Staff Development sentong ka agi



**Dimapur, Tsüklai/February 26 (TYO):** C-Edge College nung February 26, 2021 nü Faculty & Staff Development Programme ka IQAC ajanga ayongzüka Kiremwati Chair ajanga sponsor süa liasü. Iba sentong nung mezüngbuba session nung tesayur aser staff tem dena liasü, kong Nokchachila, Assistant Professor of Sociology Department menden liasü.

Kaikho Loli, Assistant Professor of History Department ajanga sarasadema iba session ya tenzük aser C-Edge College indang Principal, Dr. Chubatala Aier-i taruru pela agizükba o jembia liasü.

Mezüng session nung tongti o jembir ya Kingdom Discipleship Ministry, New Delhi nungi Rev. Bendang Longkumer liasü aser pai Tsüngrem o nung mapang indoka liasü.

Paisa mapa inyakba tesem nung Khrista mezüng südaksütsü ayongzü.

Political Science indang HoD, Viseno Kuotsu ajanga sentong tembanga jembiba mapang, Rev. Longkumer-i agiba session ajanga asenok Tsüngrem den tesendaktep yanglua mapa ajunga

tenzüktsü nungdaker ta angatetdaksügo, ta ashi.

Tanüla temeshi nem len anidaktsüba ajanga shisaliok agütsür ka ama asenoki mapa tajungba inyaktettsü aser classroom environment melenshitettsü, ta ashi.

Iba sentong tanabuba session ya telok ana kuma lemsar omeb balala nung agia liasü. Teaching faculty tem "Education in Transition: Rethinking Offline and Blended Mode of Teaching and Learning" omen nung ajemdaker technical session agia liasü.

Tashidak wara ajanga shisaliok nung kongshiba nung ajemdaker teaching-learning process nung tesayurtem sempet ulushitsü atema iba sentong ya agia liasü.

Iba Faculty & Staff Development Programme nungya COVID-19 tashidak wara poktetba sülen tesayuba aser angazükba tsütsü maongka aser tebilemtsü ajurubatem indang sensaksem kaa liasü.

Omen nung ajemdaker iba sentong nung department balala ajanga PowerPoint presentation agüja liasü.

Online ajanga sayuba aser

angazükba nung tajung aser tamajung alibatem indang Blended Teaching-Learning nung amendaker presentation agütsüba ajanga asadanga liasü.

Kasa mapang staff züngsemtem asoshia "Office Management and Work Ethics" omen nung ajemdaker technical session ka agi, kong Morung Express indang Director of News and Administration, Akangjungla shisalen sayur liasü.

Lai ashiba agi, mapa ya kanga tongtipang lir, kechiaser iba ya ajanga pei sasa pei peridaktsür, ochishia aayangtsü maongka angur, koba nisung ka ayak atema kanga tongtipang aser pela alitsü asoshi tamendak dak ka lir.

Wadang balala nung pei sempet tajungtiba agi tenzükba den külemi ochishiba, akumtsüpuba, bendanga agütsüba aser dangar tenüng masenba yimyatem ya kanga tongtipang lir, aser kati ka anepalutsüla, ta lai ashi.

Item ajunga ya sensaksemba aser mapa balala inyakba ajanga angazükdkaja liasü. Iba session tembanga College indang Office Assistant, Mohan Rana-i sarasadema liasü.

## Mon nung medical college yanglutsü...

Paisa Prime Minister Narendra Modi aser Union Minister Dr. Harsh Vardhan dang pelaba metetdaksü.

"Kiphire nem "Aspirational District" jaloktsüdang Mon atema langka ka inyaksü bilem. Prime Minister-i linük nung medical college 75 yanglutsü tebilemba metetdaksüdang iba maongkaji angu" ta CM Rio-i ashi.

Linük nung development aser health facilities maliba district balala nung college 75 yangluba nung Mon Medical College ya ka lir, ta paisa shisem.

Iba medical college ya Centrally Sponsored Scheme nung Phase-III kübok Rs 325 crore endoka yanglutsü molunga agizük. Iba ya "Establishment of new medical colleges attached with existing district/referral hospitals" scheme lir aser Nagaland nung medical college tanabuba lir.

Iba mapatong nung Centre-i Rs 292.50 crore agütsütsü aser 2023-24 nung renemtsü sentong lir. Nagaland nung backward aser state yimtiba nungi talangka pilar aliba Mon district nung medical college ajanga nisung lakh 2.5 shi ka nem healthcare facilities agütsütsü.

Health & Family Welfare Minister, S Pangnyu Phom-ia o jembidang Centre-i Nagaland nung medical college 2 tashi lapoktsüsa maongka kodanga majurudang ta ashi.

"Medical college lapoktsüba ya nübo talila akümstüba dang masü saka healthcare maparen tajungba kümdaktsütsü atema lir. Nagaland State angudang health care facility kanga mejungi liasü saka kümtem süia arudang tajungba kümogo saka ano teinyaksü aika lir" ta Minister Pangnyu-isa ashi.

"Nija mozü ki timba Kohima aser Dimapur nung dang lir aser tanünga district nung alirtemi public healthcare nung dang metaloka lir. Ajisiüaka, sorkar mozü kitem nung facility aser osettsüset peria maliba agi nübortem timtemer. Mon Medical College renemba sülen iba temeket nung alirtemi kanga ajangzüktsü" ta paisa metetdaksü.

Principal Secretary Health & Family Welfare Amardeep S Bhatia, IAS-i iba mapatong indang osang tatsüka lemsatepdang "iba mapatong ya Rs. 325 crores endoka yanglutsü aser ali acre 30 tashi alizükogo" ta ashi.

(Tapak 1 nungi...)

Tanü Dr. Harsh Vardhan-i Mon Helipad tonga arudang pa nem Rashtriya Salute agütsü aser Helipad nungi District Hospital Mon tashi aodang yimtsüng balala nungi sobaliba yartsüngangertem aser teloktemi pa pelaa agizük. Dr Vardhan kinungtsü Nutan Goel-i pa meina aru.

Iba sentong nung Nagaland Chief Minister Neiphu Rio, Health & Family Welfare Minister S Pangnyu Phom, Lok Sabha MP Tokheho Yepthomi, Principal Secretary Health Amardeep Singh Bhatia, Mon Deputy Commissioner C Thavaseelan K, Advisor Social Welfare, Home Guards & Civil Defence Noke Wangnao, Eastern Nagaland People's Organisation (ENPO) lenirtem, civil society organisations, MLAs, state BJP kettangsurtem aser tongti kettangsur aika aden.

Tanü nikongdang Dr Harsh Vardhan-i Indo-Myanmar arrtsü nung aliba Longwa yimtsüng semdang.

Honibarnü Union Minister Dr Vardhan-i Kohima nung yangluba medical college repringdangtsü aser World War-II cemetery nung semdangba sülen Imphal-i aotsü.

## BJP Nagaland Unit tir den BJP, 21 Tuli Mandal dena lir

**Dimapur, Tsüklai/February 26 (TYO):** Mokokchung District nungi BJP lenir kari Nalin S Kholi, BJP In-charge, Nagaland dangi shidi ka zülua kasaji osangkaket nung February 26, 2021 nü adoka BJP Nagaland Unit tir Temjen Imna Along tenüng menüktsütsü merangba ya kangasa tia maka, ta BJP, 21 Tuli Mandal ajanga sangdong ka nung ashi.

Nagaland nung BJP ya tashi tait national party ka kuma BJP Unit, Nagaland tir Temjen Imna Along Longkumer lenisüba kübok region nung dangari mera keta repringtsüsa aliba mapang lenir kar pei tejangraba ajanga Party tetsüng metsüdakba long ka ama akumer.

Ajisiüaka Temjen Imna Along dak party tir ka inyaksü sempet

aser tashi ya pa den tokteper aser party nung inyaker temi senzüka yutsütsü makok mesüra sendokatoktsü makok aser ibai nübur ajungai kanga junga meteta lir aser paidoktsü makokba ochi lir, ta BJP, 21 Tuli Mandal tir, Nuklutemjen ajanga sangdong nung shia lir.

Anungji BJP 21 Tuli Mandal tenüng nung tang BJP Nagaland Unit tir dak onoki tamang kateta lir, ta nenshia metetdaksür aser tamendak dak tejangja makai aitsüba ajanga Central nung lenirtem manokshitsütsü ta ozü tamang lir.

Party ya cadre base ka asünung, tilatiba jenjang nungi ola adokba ya senzüka meyütsütsüla aser lenir kar tejangraba ajanga Party renlokba nung timtem magütsütsüla, ta sangdong ajanga ashi.

## Dimapur Railway nung mejangjaba nisung ka nguteta lir

**Dimapur, Tsüklai/February 26 (TYO):** Rangapahar tsütsü 256/8 Kms anasa Dimapur Railway track nung February 26, 2021 nü mejangjaba nisung ka (Naga nung masü, tebur arishi küm 50-55 tsüngta) nguteta lir.

Ozüng agi melaba ama maparen ajak inyakogo aser iba nisungba ya train agi menüngset

südi, ta temolung melemtepi lir. Iba nisungba ya PM examination agia jangjatettsü asoshi District Hospital Dimapur Morgue nung yua lir. Kibur/kinunger mesüra tembartemi Officer-in-Charge, GRPS, Dimapur den tongtepreptsü metetdaksür, ta sangdong ka ajanga ashi.

## Nagaland Congress-i... (Tapak 1 nungi...)

Nagaland Assembly resolution nung Naga nung aliba tesemtem ka akümstüba onük maden anungji iba iba resolution nung shia aliba ama 'one solution' mengutettsü, ta paisa ashi.

"Nagaland state sorkar ya Nagaland anemertem kümogo. Parnok ya Nagaland atema inyakterem masü. NNPGs 7 indang Working Committee-i Centre den Agreed Position inyaksü molunger saka state sorkari ibaji maginür. Anungji, Assembly resolution ya Naga yimten latetba atema tetsükdaktsü ka asütsü. Iba sorkar atsingdokba ajanga dang telemetba agitettsü. Telemetba ka agitsü atema küm 24 tashi olemtepa arubaji teperi" ta K Therie-isa ashi.

EVMs MELENA BALLOT PAPERS AMSHITSÜLA:

Tanü NPCC Extended Executive Committee senden nungsa state election nung ballot paper inyakyim tenzüktsü bangzüngtep ta NPCC tirisa ashi.

Nübertemi Electronic Voting Machines (EVMs) nung temolung malemer. Nagaland nung political party ajak aser sorkari Constitution nung Article 328 agizüktsü aser State Assembly nung ballot papers amshitsü atema ozüng yanglutsü mepishir" ta paisa metetdaksü.

"Company anati EVMs lakh 38 den timba yanglu saka Election Commission of India (ECI)-i EVMs lakh 19 dang angu ta RTI report ka ajanga shiogo, süra EVMs lakh 19 ji kong lir?"

ta Therie-isa asüngdang.

Gari aser school compounds nung EVMs angubaji tebilemtsü tulu ka lir. Anungji election nung EVMs melena ballot system amshitsüla, ta paisa ashi.

"Centre nung BJP-i parnoki takok angutsü atema EVMs mamshir ta süra, ballot paper amshitsü molunga agizüktsüla. Saka parnoki EVMs ajanga takok angur süra, ballot paper amshitsü magizüktsü" ta paisa metetdaksü.

**SARFAESI ACT, 2002 MAPA KÜMA TENZÜKTSÜLA:**

Nagaland nung Nagaland Land Revenue and Regulation Act of 2002 den külemi Securitisation and Reconstruction of Financial Assets and Enforcement of Securities Interest (SARFAESI) Act, 2002 mapa küma inyaksüla, ta NPCC tir Therie-isa metetdaksü.

NPCC Extended Executive senden nungsa AICC dang Save Democracy & Save India alizüng atema State aser Union Territory ajak den mapa inyaksü ayongzüktsü lemtet.

Parnokisa State sorkar dang SARFAESI Act 2002 indang tajangzük mangu tashi entrepreneurs-i loan agiba nung yariteptsü, Farm laws 3 anema aluyimertemi lungkak aitba pusema nungitsü aser Nagaland sorkar dang state nung aluyimertem asoshi MSP den APMC's mapa küma inyaksü ayongzüktsü telemtebatem agiogo.

# Manipur nung journalist temi ano lungkak aiter



Hombarnü Prime Minister Narendra Modi-i Assam kübok Dhemaji district nung Silapathar nungi online ajanga Rs 3,000 crore alangba totzü mapatongtem lapoktsüdang agiba noksa angur. Iba sentong nungsa PM Modi-i Dhemaji Engineering College lapoktsü aser Sualkuchi Engineering College yanglutsü atema lung azüngtsü. (Silapathar, February 22)

**Imphal, February 26 (Agencies):** Manipur nung journalist temi lungkak aitba ajanga newspaper aser news channels ajak shibangogo.

All Manipur Working Journalists Union (AMWJU) aser Editors Guild Manipur (EGM) rongdak senden ka amendang lungkak aittsü telemtebaji agi.

Manipur nung anogo troknü newspaper offices aser news channels ajak shibangba sülen lapoker anogo ishika dang lir ano journalist temi lungkak aiter.

Mejangjatetba nisung kari

Poknapham osangkaket amokmerenba anema onoki lungkak aiter, ta AMWJU aser EGM külem sangdong ka nung metetdaksü.

February 13 nü telungpur telok nungi züngsem ta temolung melemi bilemba nisung kati Poknapham office nung grenade ka mereploktsü aser media house dang ita trok mapa meinyaktsü takhangba agütsü. Ajüsüaka, iba tatalokba atema telungpur telok shingaia tenüng agiba mali.

Iba lendong atalokba sülen AMWJU aser EGM-i state

sorkar dang ozüng alema mapa inyakba nisung aser telok merenshitsü takhangba agütsü.

Manipur Police-i iba atema kecha mashir saka state sorkari news agencies ajak dang mapa inyaktsü ayongzükogo.

AMWJU aser EGM-i kija/ teloktem dang ghonda 48 tsüngda email ajanga parnoki aitsüba onük atema kuli agütsütsü metetdaksüo.

Chief Minister N. Biren-i newspaper office ajak nung armed security guards mapa lemzüktsütsü ta metetdaksüo.

# Arunachal nung NSCN züngsem 8 temai adok

**Itanagar, February 26 (Agencies):** Arunachal Pradesh nung NSCN telok ana nungi telungpur 8 tashi temai adokogo.

Longding district nung telungpur 8 jagi Arunachal Pradesh Police tsüngdang temai adok.

Parnok nisung 8 rongnung NSCN-KYA nungi 6 aser NSCN-IM nungi 2 dena lir. Parnoki Longding district indang SP tsüngdang temai adok.

"Telungpur 8 temai adokbaji district police aser

Assam Rifles-i tanen makai mapa inyaka aruba ajanga lir" ta Longding Superintendent of Police, Vikram Harimohan Meena-i ashi.

"Tang temai adokertemji pei pei telok nung tongtipang menden nung liasü aser parnoki tashiyim agi sen saruba mapa inyak" ta SP Meena-isa ashi.

"Longding district nung telungpur anema mapa inyakba nung iba ya mapa tajung ka lir" ta SP Meena-isa metetdaksü.

Telungpur temai adokba

mapang Longding district nung Deputy Commissioner (DC) Bani Lego liasü.

DC Lego-i telungpurtem temai adokba atema pelaa agizük aser parnok dang taküm tasen liyonga aotsü ayongzük. Paise telungpurtem dang tanaben meyipa maotsü atema kümdanga alitsü ashi.

NSCN telungpur 8 nem surrender certificates agütsü aser parnokisa tanga telungpurtem dang ozüng alema mapa inyakba anentsü aser temai adoktsü tayongzükba agütsüo.

# Assam school tesayurtemi Assembly elections mokdangtsü

**Dibrugarh, February 26 (Agencies):** Assam nung lower primary school tesayurtemi parnok mapa regularize süjang ta takhangba agüja March 1, 2021 nungi lungkak aittsü osang metetdaksüo.

Tesayurtemi Nimna Vidyalayar Karmarata Sahakari (3rd post) Shikshak Santha kübok lungkak aittsü.

Parnokisa Assam Assembly election mokdangtsü ta amokmerenogo. Assam nung

lower primary school tesayur 700 shi lir. State sorkari aiben nangzükaka, tesayurtem ano regularize masü lir.

"Sorkari anogo ana tsüngda onok mapa regularize mesütsüra, March 1 nungi onoki state ajungalen lungkak aittsü" ta Santha working president, Biswajit Chetri-i metetdaksü.

"Onokisa taruba Assam Assembly elections mokdangtsü" ta Chetri-isa ashi.

# 'Dhing Express' Hima Das DSP kümogo

**Guwahati, February 26 (Agencies):** Assam nung Dhing Express ta tenüng jaloktsür saisaponger Hima Das nem Deputy Superintendent of Police (DSP) mapa agütsüo.

Guwahati nung aliba Sarusajai Stadium nung Assam Chief Minister Sarbananda Sonowal-i Hima Das nem appointment letter agütsü.

Iba sentong nung Assam CM Sonowal aser DGP Bhaskar Jyoti Mahanta nati Hima Das indang tapubang nung Assam Police indang DSP insignia enoktsü.

Tanü Hima Das-i Assam Police DSP inyaktsü atema tezüngzüktep agi.

Sentong nung Hima Das-i o jembidang Assam Police

Department nung inyaktsü mapa agütsüba atema Assam CM Sarbananda Sonowal dang pelaba metetdaksü.

"Iba ya ni ajungmesoba inyakyim tulu ka lir" ta Hima Das-isa ashi.

"La ya track & field nung tajungtiba dang masü saka o jembir tajung ka lir" ta DGP Bhaskar Jyoti Mahanta-ia ashi.

DSP Hima Das dak alia tanü iba sentong nung Sub Inspector 597 nem appointment letters agütsü.

"Tang mapa nung aniokba SI temi nübortem tajungba nung tenzüktsü aser Assam o Assam Police tensa tajungba akümtsü imlar" ta Assam CM Sarbananda Sonowal-isa metetdaksü.



Hokolbarnü 23 Sector Assam Rifles nung Aizawl Battalion sepaitemi Mizoram kübok Hnahthial tesem nung Rs 3.4 crore alangba heroin gram 762 apuba sülen agiba noksa ka angur. (Aizawl, February 26)



Hokolbarnü Agartala nung Tripura Chief Minister Biplab Kumar Deb aser Minister of social justice and Empowerment, Government of India, Thaawarchand Gehlot-i teintet rogotem nem living devices balala agütsüdang agiba noksa angur. (Agartala, February 26)

# Tripura nung BJP-IPFT mepetmesü tuluba akümer

**Agartala, February 26 (Agencies):** Tripura nung BJP-IPFT teloktep nung mepetmesü tuluba kümogo.

BJP lisopur lennirtemi TTAADC elections nung IPFT den teloktep alitsü tejangraba mali ta ashir.

IPFT lennirtemi Pradyot Deb Barman-i aniba TIPRA telok den Khumulwng nung sentong ka nung shilem agiba sülen anogo ishika lir külen BJP lisopur lennirtemi iba osang metetdaksü.

Tripura state sorkar nung BJP den yariteper Indigenous Progressive Regional Alliance (TIPRA) aser Indigenous People's Front of Tripura

(IPFT) tsüngda tawa tu TTAADC nung elections atema lokteptsü telemtebaji agiogo.

BJP party osang ka ajanga ashiba agi parnoki Tripura BJP president Manik Saha dang taruba TTAADC elections atema IPFT den tesentaktep alitsü tejangraba mali ta shidi ka zülüogo.

BJP lisopur lennirtemi TTAADC elections nung parnok kija dang toktepnür ta shiogo.

Iba shidiji Tripura BJP president Manik Saha-i Delhi nung BJP central leadership dangi yokogo. Tripura nung BJP nungi lisopur MLA 10 aser lisopur MP ka lir.



## TIR YIMYIM YIMOBILEM (EDITORIAL)

DIMAPUR KÜPTOKNÜ, TSÜKLAI (FEBRUARY) 27, 2021

### Züsentetba Nung Tepela

- Tangsen Lemtur

**N**ikongdang 5:30 ako nungi office mapa inyaker aser anüngdangbo kechiang-a meinyaki küm aika süidaktsüogo, saka yakümbo ak mesüba den külemi kima atsü nung züngi, mapu, lao, likok, beans, squash, manü aser alishi (shi) tsünüba agi anogo shia langkabosa inyaktsüsa aküm. Ajioda aluyimba indang kecha memetetaka kidang-kiyonger aser tsürabur den asüngdangtepa anepaluba agi kanga junga züsenteta aonsotsü nung sen kangabo mindok. Yamaji mazüngi inyaker pei sasa züsentetba nung tepela chiteta liasü. Takümbo ak-a timba mesür, anungji alu tilaka chia mendi den alishi 300 shi temogo. Yaküm November ita tatembanglen nungi India nung aluyimertem Delhi arrtsülen adenshia Centre sorkari benokba ozüng tasen anema longkak aitdar. Talisa aluyimertemi parnoki alu nungi züsentetba tsük, wheat aser aonsotsü balala nung minimum support price (MSP) agüjang ta akhanger. Mapang shia aluyimertemi yipru mopung, tzümetsüng aser tsüngsarusa mapang alu nung takoksa tulu anguba atema temenok agüjang ta akhanger. Item ama lendong balala ajanga alu nung takoksa tulu anguba agi India nung anogo shia aluyimertem soseta asüba osang asenoki angashir, ajisüaka asen lima nungbo alu nung takoksa anguba agi soseta asüba osang mangashidang, iba denji külemi asen lima nungbo tsüngsarusa majurur mesüra mapang shia yipru mopung agia mekongshir, anungji aluyimba nung takoksa majurur. Akhidangbo Naga nung nütüng timbaka aluyimertem liasü, saka tanübo alu yimner mali aser yimdaklirtemia jila/ yimtitem nungang oa liner. Joko asen lima nung aluyimertem kanga ajema kümogo. 2008-09 küm Ao lima yimtsüng ka nungbo mapok-tsük lu ayimer kibong ka dak alaka aluyimer maliasü! Joko temelenshi putu nung alir asünungji tsük lu sa meyimaka aonsotsü aser süngjanglijang balala lu ayimtsü akok aser karibo yimdar. Asen lima yimtsüng kar nung mersü lu, yim kar nung jiru lu aser yim kar nung züngi lu yima jenti züsenteter; Longkum nunga bengana lu tulu yima jenti züsenteta ayoker aser market linkage junga lir. Akhidangbo tanü amai sorkari aluyimertem yaria maru südi, ajisüaka tanübo sorkari aluyimertem atema sentong balala katsür aser senotsü agia yaria nungitba den külemi tayokdak (market) bushitsür, anungji item lenmangji junga meteta alirtemibo tuyutsüla. Sorkari state nung market bushitsür, saka kodang asenoki aonsotsü aser süngjanglijang lu tulu yima aika züsentetdir asenoki market mebushidangyongi tangari bushia arutsüa akok mesüra state adener tangalen-a yoktettsüsa market tesendaktep angutsü lenmang lir. India linük nung nütüng shilem 58 bo aluyimertem mesüra alu nung aayangertem lir; asen tsüraburtema aluyimertem liasü, saka tanübo asen lima nung aluyimertem shilem kanga ajemogo. Sen aazüksü atemasa mesüaka kima moapu/jaka alirtemibo atsü tilaka yima pei peritsüsa aonsotsü tsünütsüla. Ano jilai oa mapa tilateri bushia kecha meinyaki kazüba dang nungibo pei yimdak oa aonsotsü/süngjanglijang lu yimtetra iba jagi pei poksüng litetba dang masü saka yimtsüng rongsenkettsüng-a ajungkettsütsü.

## OLEMSABANG

### HORNBILL FESTIVAL - SHIBA AJANGZÜKER?

- Wati Longchar (Serampore)

(Yashi adok nungi...)

#### Tourism industry zünba

Alima nung industry tulutiba pungu rongnung tourism industry ya dena lir. Industry tulutemji: Oil & Gas, Automobile, Arms, Pharmaceutical aser Tourism industry ya lir. 300 million shi, tetezü meimchir noklang nung 10-bo tourism industry dak sendakba mapa inyaker. Küm ishika tejaklen temesüng nungeri dang leisure travel oteta liasü, saka tanü rongsen renloka akümba ajanga leisure travelers China, Korea, Japan, Malaysia, Singapore aser India nungia aika akümer. UN sangdong ka ajanga ashiba agi, 2019 nung international tourist alima balalai 1.5 billion oa liasü, aser 2020 nungbo 1.6 billion imlaa liasü, saka Covid-19 wara ajanga tourism industry laodaktsüba ajanga nisung aika mapa maka aküm ta ashir. Tanü leisure travel senzür 2019 Asia nung yamai arua liasü (kar dang tatishitsü sayur): India - 10.7 million; Nepal 1.17 million, Thailand 40 million, Singapore 19.11 million, Malaysia 26.1 million, Taiwan 11.84 million, Nagaland 5577 liasü. Alima balala repranga senzürtemji shirnok? Takartem. Takar lima kar nungbo, kinunger ajonga, mesüra medemer telok telok, kiyonger, zünga balala, tantsü-tamburtem telok balala, yakümto iba country to agi aoji, takümbo iba lima jagiang odi ta küm shia sentong balala yanglur senzüba ajangshia aruogo. Country balalai oa alima repranga senzütsübaji sensakeri pungmang nunga mepungmanger; kima atena aotsüba sünga tasak. Foreign-i aobaji kotak tongtet amai akhüm keta repranger. Anungji sensaker shirnok kecha limaia mouteter, parnoki tourist arudang kechi bilemya alitsü! Jangratemtsüka, alima nung aso talang ta bilemstü. Tourist ajak takar ta bilemstü, jenjang temaba nung alirtem ta bilemstü. Aser tourism industry dak metaloker alirtemi koda sür tourist puatsü, parnok peladaktsütsü, parnok jangratemdaktsütsü mapadong asameyangtsü aser inyaktsü.

#### Bendanglen Jajartem

Nüburtem mapang shia bendanglen, aenlen jajatsüsa akümer. Tongmelang agi aenlen senzübaji tapu asem küma lemsatsü akok: (a) Nungdak atema jajaba (b) Tamang akangshitsü atema aoba, (c) Shi jangratem angutsü asoshi jajaba.

Nungdak atema senzüba - Tanüptsü bushia mozü ki alima tangai bushia aoba, shisaliok tebushi aoba, taoba putu tatalokba otsü-olem angazüktsü bushia aoba (tat. agi, Vietnam nung America nungeri koma teraksa adokdaktsü, World War II nung atom bombi Japan poksatsüba, Pol Pot-i Cambodia nung nübur rishikangshiba aser tepsetba, India nung Taj Mahal, China nung Great Wall, a.a.), sobaliba balala angazüktsü, shishilemba mapa balala atema senzüba, telok nungdak asoshi senden aser mensem (conference, meeting, a.a), balalai aoba, missionary mapa inyaktsü aoba, kinunger, chirnur, pei medemer semdangi aoba, mapa balala inyaktsü aoba, a.a. Alima tesademba, tajungba bushia oa yangji aliba. Yamaji nungdak balala atema aenlen senzütsüsa akümer aser aji tongtibang.

Tamang akangshitsü aser tanela asüngsashitsü atema senzüba - Tamang yimsü aikati yimsü tetenzükdak tesemji temeshi yimti/lima ta wazüka ayur. Muslim nunger shiai, iba lima nung taküm alidang, temeshi yimti Mecca, kong Mahammad aso, iba yimti jagi khenbosa oa külemtsüla ta sayur. Hajj aoba ajanga taoba temenentem pongitsü aser taküm tasen küma soshir ta amanger. Ibai 7th century nungi tenzüka tanü tashi kanga metsünga reta Hajj-i aor. Küm shia million aika Mecca yimti bushia arur. 2019 küm 2.5 million tema hajj atema alima ajaklen nungi Saudi Arabia bushia aru. Yamaji Khristan-a tamang akangshitsü asoshi Yisu asodaki "Holy land tour" aor. 2019 nung Holy land tour Yirusalemi aortemji 4.7 million liasü ta ashir. Buddhist-a yamaji Buddha asoba jaka Bodh Gaya bushia arur aser yaküm küm (2019) nung lakh 5 tema semdang ta ashir. Kasaji India aser Nepal nung Hindu tekülem ki, ayong, awatsüng tesem balala temeshi ta wazüka yua lir aser itemji tanela asüngsashitsü atema semdang. Yamaji alima ajak nung tamang asüngsashi atema jajartem jendi lir. Item dang "pilgrimage", tetezü tamang akangshidaktsütsü, tanela asüngsashi asoshi jajaba ta ashitsü akok. Sensakeria sünga, taküm piyong sen bendener temeshi limaji semdang.

Shi jangratem angutsü atema senzüba - Kodangcommercial tourism industry ta asür, iba dang ya pei sasa pei shi jangratem atalokdaktsütsü bushia jajaba ta ashitsü akok (self-seeking pleasure). Iba yabo takari dang senzür. Takar karbo sen kong-anga meindoki lir, anungji parnoki alima tesem balala repranga senzür. Ano Company aikati mapa inyaker nem tour package agütsür. Küm piyong kanga dang lendong aketba mapatem inyaka arur, mesüra ammag-sangwa mebendang kibur tajangzük atema shishilemba mapa balala inyadkaja arur, parnok peladaktsütsü aser kibur anema mepela ola madokdaktsütsü, mesüra longkak maitdaktsütsü asoshi, parnok küm piyong talenba kübok inyaka aruba tekurem sala yoktsü atema tour package agütsür. Ano country tila aika nung tebur ajak military training agidaktsür. Küm ana-asem timtema training agia arur, parnok peladaktsütsü atema Govt.i tour package agütsür. Ibalala tourist-i tangar sobaliba, temeküt wazüka ayutsüba, mesüra meimchir taküm kecha hau ta mali pei senütsü süa, pei shi jangratem dang asa inyaker. Item tourist jagi alima dangi teraksa tulu bener arutsür. Goa, Bali, Chiang Rai, Bangkok, Manila ama nung item shi jangratem bushir tourist-i teraksa tulu bener arutsüba otsü azünger.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

# Papua nung Khristan lenirtemi rara anentsü atema mepishir



February 25, 2021 nü Papua province nung Khristan lenirtemi sepaitem aser nüchiso bushir teloktem dang rara anentsü mepishiogo. Noksa nung (abelen nungi) Merauke Arogo nungi vicar general, Hengky Kariwop, Jayapura nungi tongti putir, Leo Laba Ladjar, Agats nungi tongti putir, Aloysius Murwitos aser Timika Arogo nung administrator, Marthen Kuayo iwop nunger angur.

**Jakarta, February 26 (Agencies):** Papua province nung Khristan lenirtemi tang sepaitem aser nüchiso bushir teloktem tsügra raraba anentsü atema mepishiogo.

Papua nung rara liaka Indonesian Bishops' Conference-i kecha masü ama toktsür, ta putirtem aser Khristantemi aitsüba sülen February 25, 2021 nü Khristan lenirtemi rara anentsü atema tayongzükba agütsü.

February 25 nü Khristan lenirtemi sangdong ka ajanga, taoba hopta Intan Jaya & Puncak district nung sepai ka, itangitba mapa inyaker ta tai tonglokja alir ka aser civilian asem tepsetba sülen nisung meyrjang aika jenshiogo, ta metetdaksü.

"Takoksa angurtemji shiba

südir süaka parnok atema onoki mangyimer aser iba rara ajanga onok jashir. Police süaka sepaitem süaka mesüra nüchiso bushir teloktem süaka rara adokdaksürtemji metentsüsü makok. Ochi aser temeden atema raratetsü saka azü tokshia raraba ajanga kodanga takok mangutsü. Rara ajanga ano rara taliba adokdaksütsü. Anungji onoki telok ajak dang rara anentsü ayongzükba," ta Khristan lenirtemi metetdaksü.

Temepishiba shidi nungji Jayapura nungi tongti putir, Leo Laba Ladjar, Agats nungi tongti putir, Aloysius Murwitos, Timika Arogo nung administrator, Marthen Kuayo aser Merauke Arogo nungi vicar general, Hengky Kariwop nungeri sign süa lir.

Taoba ita Khristan activist, Melvin Waine-i, Arogo züngsemtemi ajangshiba tebilemstü balala atema lenirtemi ola adoktsüla, ta shia Khristantemi Papua nung putirtem dang mepelaba lemsatepa liasü.

Paisa, putirtemi lisopurtem atema inyaksüla, ta jembi.

Tawa police aser sepaitemi telungpurtem dang prangpong ayokba atema police ana pua liasü. West Papua National Liberation Army dang prangpong aser injang ayokba atema February 20 nü Maluku province police ana apu aser special team kati iba ken oji bushisingdangdar.

Yaküm February ita nunga telungpurtem nem raraba hadir agütsüba atema police-i sepai asem pua liasü.

# Islamic kiralongrartemi Pastor Yikura tepsettsü amokmeren



Brethren in Nigeria (EYN) Arogo nung pastor, Bulus Yikura

**JOS (Nigeria), February 26 (Agencies):** Nigeria nung Islamic kiralongrar telok kati pastor ka pua liasü, aser tawa parnoki video ka ajanga, parnoki akhangba ama sen magütsüra parnoki March 3, 2021 nü pastor Bulus Yikura tepsettsü, ta amokmerenogo.

Video nungjisa Brethren in Nigeria (EYN) Arogo nung pastor, Bulus Yikura-i sorkar aser Khristan lenirtem atema

pa chioktsü atema inyakdaksüner, ta mepishia lir.

Iba video ji Boko Haram nung Abubakar Shekau-i aniba teloki saya. 2015 küm parnoki Islamic State kiralongrartem den tesendaktep yangluba sülen Islamic State West Africa Province (ISWAP) nungja agi melena liasü.

February 24 nü video

nungji Pastor Yikura-i, "Ni linük Tir, Muhammadu Buhari aser Borno State Angh na dang ni yaritsü mepishir, kechiyong tanü, February 24 nü kü nem hopta ka mapang agütsüogo. Nenoki ni mesüdaksünüra Tir ka ama, Angh ka ama aser local government chairman ka ama ni kümzükang ta ni mepishir," ta shia lir.

Khristantemi ashiba agi, kiralongrartemi December 24, 2020 nü Borno State kübok Pemi yimdak Pastor Yikura pua liasü, aser züngsemtemji Boko Haram telok nungi lir, ta metetdaksü.

Pastor Yikura-isa Christian Association of Nigeria (CAN) aser EYN Tir danga pa chioktsü atema inyakdaksüner, ta mepishiogo.

"Ni asoshi sarasademjang. Linük nung ozü tsürabur ka ama aser kinüngertem ama nenok den jembitsü atema tanü ni tatembangbuba maongka angur. Yimlibilema ni yariang aser kümzükang," ta pastor-i mepishia metetdaksü.

# ANO GO ABEN TSÜNGREM DEN

## Kü kiyonger shiba?

Luke 10: 25-37

Ne kiyonger na ama meimang. Luke 10:27

Kü kiyonger shiba? Ibai tasüngdangba tajung. Ibai ano kanga taktsü ka lir. Aikati pei kiyonger anatiba tenünga memeteti alir. Kari metettsüa memeranger.

Yisui Tajung Samaria otsü nung ashibaji asen teyari nüngdaka alir ajakji asen kiyonger lir. Asenoki asenok meimba ama asenoki parnok dang meimtsüla. Ibai kanga tebur tajung.

Yiruko leman nung züker aliba nisungi teyari nüngdakba ama asen kiyonger nüngdakji alitsü akok. Asen kiyonger nüngdak aika lir. Kar azüngmeyaka lir. Kar tsüngi o agi anunga lir. Tasübai temeimer ka agitsü akok. Kar mapa samadok.

# Vietnam kübok Ho Chi Minh yimti nung tekülem kitem lapoktsü melar



Vietnam kübok Ho Chi Minh yimti nung coronavirus wara bulua prokba mapang kibong kati online ajanga tekülem sentong nung adenba noksa nung angur.

**February 26, 2021:** nungi Mary Nguyen Thi Lan-Vietnam nung nung aliba i, "Health ketdangsertemi commercial yimti tulutiba, Ho tuyuba ama onoki Covid-19 Chi Minh nung tesüiba hopta anema telatetbatem shidak ana tsüngda shinga dak-a benshia aruogo aser online coronavirus tashidak ajanga dang tekülem sentong meputetba sülen nung dena aruogo, kechiyong ketdangsertemi non essential coronavirus anema raraba services melaba den tekülem nung Khristantemi tatishitsü kitem tanaben lapoktsü tajung sayutsüla," ta melaogo.

Ho Chi Minh City Yimti nungsa taruba hopta People's Committee nung nungi school tem tanaben vice-chairman, Duong Anh lapoktsü melar.

Duc-i, March 1 nungi Tesüiba anogo 16 tashi tenzüka restaurants, yimti nung nisung shinga cinemas, entertainment dak-a coronavirus tashidak centers, malls, tourism aser meputeti liasü.

transportation den inessential District 8 nung services tanaben lapoktsü coronavirus tashidak putetba melar, ta metetdaksü. sülen February 9 nungi yimti

Ketdangserisa, March 1 nung ketdangsertemi nungi tekülem kitem lapoktsü services aser tekülem kitem melar, saka khen nung nisung densema public facilities ajak timba agia 50 dang shibangja liasü aser adenshitsüla aser covid tamangba yimsü dak anema telatetbatem sendakba sentongtem nunga benshitsüla, ta metetdaksü. nisung 20 dak tema Tong Viet Buong Arogo adenshitsü memelai liasü.

**OLONG PAITEP # 5737**


1				2					3	
						4		5		
6			7							
					8		9			10
11										
12		13					14			
		15								
						16				
	17									
					18					

- |                              |  |   |  |
|------------------------------|--|---|--|
| <b>TIPILEN</b>               |  | <b>LANGTSÜNGLEN</b>                     |  |
| 1. Yakob tetsü - (6)         |  | 2. _ _ _ gki - (3)                      |  |
| 4. Mezüng nisung - (4)       |  | 3. Telungpur telok ka - (2)             |  |
| 6. Tasen lai kaket ka - (5)  |  | 5. Tsüngremi mezüng poktetdaksüba - (5) |  |
| 9. Au lanu - (2)             |  | 7. Tia - (4)                            |  |
| 12. Tejen lai 21 buba - (11) |  | 8. Yakob-er jabaso ka - (5)             |  |
| 15. Tekolak tembar - (2)     |  | 10. Abraham tebutü - (4)                |  |
| 16. Zütsüra anepsang - (5)   |  | 11. Rebeka kinungpu - (4)               |  |
| 17. Kain tenu - (4)          |  | 13. Esau tenu - (5)                     |  |
| 18. Hana-er jabaso - (6)     |  | 14. Tzünglu tilala aru - (4)            |  |
|                              |  | 16. Jafet tebu - (3)                    |  |
|                              |  | 17. Teka agi kongshi - (2)              |  |

**OLONG PAITEP # 5736 TELANGZÜBA**

- |  |   |
|--|---|
| <b>TIPILEN :</b>   | <b>LANGTSÜNGLEN :</b>   |
| 2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso, | 1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata. |

**Noksa nung meputepi aliba 10 bushiang**



**TANÜBO NAI LANGZÜANG**

Q. 2nd phase Intensified Mission Indradhanush ya kodang lapoktsütsü?  
 A. February 22, 2021                      B. March 22, 2021  
 C. April 22, 2021                          D. May 22, 2021  
 \_\_\_\_\_ (Taruba adok nung onoki langzüsü)  
**YASHI ADOK TELANGZÜBA : All the above**

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimiyim bureau tem nung agüjang.

**Tepela Tasoba Anogo**



1. Tenüng : .....
2. Tasoba anogo: .....
3. Küm : .....                      4. Class : .....
5. School : .....
6. Talidak : .....
7. Salem osang : .....

**NAI-A YA METETTER MA?**

**INDIA NUNG NÜBURTEMI SAPUA AMSHIBA SMARTPHONE**

**KAR: FEBRUARY 2021**

- |                      |                           |
|----------------------|---------------------------|
| * Samsung Galaxy A51 | * Apple iPhone 11         |
| * Redmi Note 8       | * Samsung Galaxy S20 Plus |
| * Redmi 8            | * Samsung Galaxy A10s     |
| * Vivo S1 Pro        | * Samsung Galaxy A20s     |
| * OnePlus 7T         | * Apple iPhone XR         |

**SUDOKU # 5778**

				6	4			8	2						
8					3			4	1			2	1	9	4
9								6	5			5	6	4	9
3	7	5	8	1	9							1	5	7	8
	8		3	4	7							6	9	2	7
4	1								3			4	3	8	5
				2								3	7	1	2
	6	8		3		4						9	2	6	3
7	5						2	9				8	4	5	1

**TELANGZÜBA # 5777**

8																
9																
3	7	5	8	1	9											
	8		3	4	7											
4	1															
				2												
	6	8		3		4										
7	5						2	9								

**OJANG LUTEP # 5324**

- |              |   |                         |
|--------------|---|-------------------------|
| OELKT        | : | □ □ □ □ □               |
| GNNU         | : | □ □ □ □                 |
| TOKBAZÜA     | : | □ □ □ □ □ □ □ □         |
| MBAAAK       | : | □ □ □ □ □ □             |
| NAAAJG       | : | □ □ □ □ □ □             |
| JGMYAAAPNIMI | : | □ □ □ □ □ □ □ □ □ □ □ □ |
| EIP          | : | □ □ □                   |
| PIE          | : | □ □ □                   |
| TSÜSNÜÜ      | : | □ □ □ □ □ □ □ □         |
| SÜSÜDAKT     | : | □ □ □ □ □ □ □ □         |

**OJANG LUTEP TELANGZÜBA # 5323**

**ALIZÜNG TONGTETSÜ ATEMA MERANGA INYAKTSÜBA  
 DAK ALAKA TANGA LENMANG MALI**

**TAN HOPTA ATEMA - KOMA SÜLA ?**

Q. Ao oshi renloktsü atema Aor kibongtem nung teyaritepertem tangar kin nungi masü Aotsür Aortem dang ayu nunga koma süla?

# Election duty lemezüker ajaki Covid vaccine agitsüla: EC



New Delhi, February 26, 2021: Hokolbarnü New Delhi nung osangbenertem senden nung Chief Election Commissioner, Sunil Arora (tiyong) aser Election Commissioners- Sushil Chandra aser Rajiv Kumar nungeri jembiba noksa nung angur. EC-i Assam, West Bengal, Tamil Nadu, Kerala aser UT- Puducherry nung assembly elections agitsü atema anogotem sangdongogo.

## New Delhi, February 26

(Agencies): State aser UTs pongu nung assembly election agitsü mapang ana nung lia Hokolbarnü Election Commission-i, election duty lemezüker ajaki jelia coronavirus vaccine agitsü, ta metetdaksü.

Kobi melii Assam, Tamil Nadu, West Bengal aser Kerala state tem den 30 Puducherry UT nung assembly election agitsü.

New Delhi nung osangbenertem senden nung jembidang Chief Election Commissioner, Sunil Arora-i,

assembly election pongu nungji menden 824 atema polling station lakh 2.7 alitsü aser voters crore 18.68 lir, ta metetdaksü.

Coronavirus wara aliba nung ajemdaker elections nung tokteptsü atema candidate temi online ajanga dang nominations file asütsü aser vote agütsüba mapang ghonda ka tali melatsü.

Kibok shia oa nüboyimtsü atema candidate densema nisung pongu dang melatsü aser election atema nüboyimba roadshows nunga gari timba agia pongu dang melatsü, ta

Arora-isa metetdaksü.

Assembly Election matongdangsa election officials-a ajak coronavirus vaccine agitsü, ta pai metetdaksü.

Item states nung March 27 nungi tenzüka April 29 tashi election agitsü. West Bengal nung shilem ti lemsar election agitsü, Assam nung shilem asem aser Kerala, Tamil Nadu aser Puducherry nungbo April 6 kija nung election agitsü. May 2 nü states aser UT ajak nung votes zünga election osang sangdongtsü.

# Nirav Modi puoktsü atema Mumbai Jail nung Cell ka renemogo

Mumbai, Tsüklai/February 26 (Agencies): UK nung aliba court kati India nunger diamond shishilemar, Nirav Modi India-i anir aotsü atema obendang agütsüba sülen Mumbai nung aliba Arthur Road jail nung ketdangsertemi pa puoktsü atema special cell ka renemogo, ta Hokolbarnü ketdangser kati metetdaksü.

Punjab National Bank (PNB) senotsü ochimashi ken o nung India-i pa linüki anir arutsü meranger. 2019 küm arrshi küm 49, Nirav Modi apuba sülen pai aiben bail meshiogo saka pa anema benokba ken oji tulu asübayong pa nem bail magütsüi London nung aliba jail ka nung puoka lir.

Hokolbarnü Mumbai nung aliba jail ketdangser kati, "Kodang Nirav Modi, Mumbai-i anir arudir pa barrack number 12 nung aliba cells asem rongnung ka nung ayutsü; iba ya security akanga aliba barrack lir. Iba jail nung Nirav Modi puoktsü atema maparen tembangogo aser pa puoktsü atema cell renemogo," ta metetdaksü.

Brihostibarnü UK nung aliba court nung judge kati, Nirav Modi-i India nunger court nung telangzüba agütsütsü aliba dang masü saka India nung iba ken o nung obendang shidak agütsütsüa lir, ta metetdaksü.

Nirav Modi-i küm ana tashi

pa India-i marutsü atema court nung raraa liasü saka tatemsa pai tamakok nguogo.

Centre sorkari state home department dang iba ken o dak sendakba osang metetpelaba sülen UK nung aliba Westminster Magistrates Court matsüngdanga benoka liasü.

Maharashtra sorkari shidi ka ajanga Centre sorkar dang Mumbai nung aliba jail nung aliba facilities osang tejangja metetdaksüogo.

Nirav Modi barrack nungji puokra pa atema tepoukba takdangji square meters 3 asütsü; takdang nungji atem nung alemba sü ka, pillow ka, bedsheet ka aser blanket ka alitsü, ta jail ketdangserisa metetdaksü.

# India kübok state trok nung coronavirus wara bulua prokdar

## New Delhi, February 26

(Agencies): Tesüiba anogo tashidak kanga bulua prokdar, aser ibaji ajanga ano tanaben asentenshir linük nung iba wara tanaben proktsüa akok, ta aikati bilemer.

Talisa state trok nung iba tashidak kanga bulua prokdar, aser tesüiba ghonda 24 tsüingda iba tashidak putetba shilem 85 bo state trok nungji lir.

Maharashtra aser Kerala na nung iba tashidak asentenshia tanaben proker asütsüa akok, aser tanga state tem nunga tanaben proktsüa akok, ta mongintemi bilemer.

Chennai nung aliba Apollo Hospital nung infectious diseases specialist, Dr V Ramasubramanian-i, "India nung tanaben iba wara proktsüi takoktsü. Ajisüaka tanga linüktem den medemdanga India nung mesashiba asütsü, kechiyong India nung nütsüngji kanga lanuba," ta metetdaksü.

Tang India nung coronavirus tashidak agi teshirangdakpur nisung 1,55,986 lir aser ibaji caseload nungi shilem 1.41 lir.

Tesüiba anogo tenet tsüingda India nung UT aser state 10 nung iba tashidak agi shiranger ano timba kümogo (15,000 agi timba aküm).

Tang linük nung coronavirus tashidak timba putetba state ji Maharashtra lir; tesüiba ghonda 24 tsüingda iba state nung nisung 5,000 jungnü dak covid putet.

Taoba hopta (February 18-24) Maharashtra nung iba tashidak agi teshirangdakpur 21,358 liasü, Punjab nung 866, Madhya Pradesh nung 407 aser Karnataka nung teshirangdakpur 379 liasü.

Iba dak alia iba tashidak agi asürtem shilem 86 bo state trok nungji lir.

Tang tashi nung linük nung iba tashidak agi nisung 1,56,825 süogo; Maharashtra nung 51,993, Tamil Nadu nung 12,483, Karnataka nung 12,316, Delhi nung 10,905, West Bengal nung 10,260, Uttar Pradesh nung 8,723 aser Andhra Pradesh nung nisung 7,168 süogo.

Health Ministry-i ashiba agi, Lakshadweep nunga tang mezünga iba tashidak agi nisung ka süogo.



February 26, 2021 nü New Delhi nung Confederation of All India Traders (CAIT) züngsemtemi GST nung ozüng kar anema longkak aيتدang tangokba noksa nung angur.

# Kasa o kasa na kibong akümstsü atema temeden mali: Centre

## New Delhi, February 26

(Agencies): Centre sorkari Delhi high court dang, kasa tetsür o tetsür na mesüra tebur o tebur na kibong akümstsü atema temeden mali, India nung kibong akümbsa ya nisung ana longjemba dang masü saka tetsür ka o tebur ka na kibong ka ama longjemba institution ka lir, ta metetdaksü.

"Kasa o kasa na partner ama aliba aser shi nung medembaji India nunger kibong ka nung kinüngbu, kinüngtsü aser tanurtem aliba den medemdangtsü makok. Tebur kaji kinüngbu aser tetsür kaji kinüngtsü lir aser tena longjemba ajanga tanurtem asor," ta sorkari affidavit ka ajanga metetdaksü.

Linük aika nung kasa tetsür o tetsür na aser tebur o tebur na kibong akümstsü agizükdar, yamaji India nunga kasaji agizüktsü atema temepishiba

ken otem court nung benoka lir. Court dang item temepishibaji magizüktsüla, ta shia Centre-i, tebur kaji kinüngbu ama züngshitsüla, aser tetsür kaji kinüngtsü ama züngshitsüla, iba dak alia tanga teratetba lira ozüng aika tamagitsü akümstsü, ta metetdaksü.

Centre-isa, kibong akümbaji loktiliba nung nisung ana longjemba lir, aser iba nungji judiciary-i tiyongtsüi aitra ibaji ajanga ozüngtem nung timtem agütsütsü, ta ashi.

Kasa tetsür o tetsür na aser tebur o tebur na kibong akümstsü atema high court nung temepishiba ken o asem benoka lir.

Justices- Rajiv Sahai Endlaw aser Amit Bansal nati temepishiba ken otem benoka aliba dak sendakba nung Centre sorkar dang nungi telangzüba meshia liasü.



Ranchi, February 26, 2021: Petrol, diesel aser LPG gas jenjang atuba anema Hokolbarnü Ranchi nung National Students Union of India (NSUI) züngsemtemi LPG cylinder tazüng amer longkak aيتدang tangokba noksa nung angur.

# Myanmar nung longkak aitba tensa tamajungba akumer



Mandalay, Myanmar nung Hokulbarnü Buddhist nun temi Myanmar lenir Aung San Suu Kyi indang noksa amer yimtung süa jajaba noksa nung angur. Mitkar temi tashiyim amshia sorkar atsüngdokba anema Mandalay nung Hokulbarnü nüburtemi longkak aita yimtung nung jaja.

**Yangon, Tsüklai/February 26 (Agencies):** Myanmar indang yimti tulutiba ana nung longkak aiter senshidaktsütsü atema police temi Hokulbarnü stun grenade, rubber bullets aser prangbong anünglen khaloktsü, ta tenük kuli alirtemi ashi, kong mitkartemi tanaben yimsü asütsü merangba anema nüburtem longkak aiter.

Yangon yimti nung longkak aitba tesem nung nisung ka yiru aser Mandalay yimti nunga nisung kar yiru, ta ashir.

February 1 nü mitkartemi sorkar atsüngdoka sorkar lenir Aung San Suu Kyi aser lar party lenirtem apuba sülen iba Southeast Asia linük nung mepetmesü adoka lir. Suu Kyi'er teloki takok anguba November election nung ashikülak mapa inyaka, ta mitkartemi ashishitepba sülen parnoki sorkar atsüngdoka liasü, saka election commission-ibo election kanga junga agitetogo, ta ashir.

Suu Kyi ya lar kidang pua yua lir aser la indang okatsür

kati ashiba agi, la okadaki arutsü anogo asem lia pai la den ajuruteptsü memela, anungji ken o shidak jembitsü temeden magütsür, ta ashir.

Democracy busemertemi hopta asem shi anogoshi amai longkak aita arur aser iba mapang kin balala aliba linük nungya nisung meyrirjang aikati shilem agir.

Yangon nung Hokulbarnüa lanurtem timba sür nisung noklang aika adenshi, saka police tem aruba sülen parnok timba sama.

Saka mapang tatsüka lir telok kar tesem balala nung adenshia yimyim ayim aser riot police den raratep, shirnoki nüburtem jenshidaktsütsü asoshi anünglen stun grenades aser injang khaloktsü.

"Ni ki ka nung atsükdaktsü. Ni iba ki yutsür moteter, kechiaser police anasa lir aser anünglen injang khashishiba manener," ta osangbener kati iba tesem nungi ashi.

Nisung ishika pua liasü, aser item rongnung Japan

nunger osangbener ka densema liasü, shiba mapang tatsüka lir chiok.

Mandalay nunga police temi rubber bullet khaloktsüba osang lir. Noksa ka social media nung prokshiba nung nisung ka tetsüng nung azü alua yirur aliba nguogo. Saka pa ya komasür yiruar memetet.

Mandalay nung tanur ana yiru, ta emergency service worker kati ashi.

Linük yimtiba Naypyitaw, Magwe jila aser Hakha jila nunga police temi longkak aitertem aridok, ta osang ajanga ashir.

# Nigeria nung telungpuri school tanur 300 dak tema pua bener ao

**Abuja, Tsüklai/February 26 (Agencies):** Nigeria northwest tsütsü Zamfara state nung prangbong bena alir mejangjaba nisungtemi school tanur tetsür 317 pua bener ogo, ta police temi Hokulbarnü sangdong ka nung ashi, koba hopta ana tsüngta tashiyim agi pua bener aoba lendong tanabuba ataloker alitsü.

"Ayatirm nung mejangjaba nisungtemi Jangebe Government Girls' Secondary School lungbanger tetsürtem ya pua bener ao," ta Zamfara state indang information commissioner Sulaiman Tanau Anka-i osangbener dang ashi.

"Parnok ya gari nung aru aser kaketshirtem anir ao, parnok karbo tetsüng agi anir ao ta ni osang angazük. Security forces temi iba tesem nung mita bushir," ta Anka-i ashi.

Tetsür 300 dak tema pua bener ogo, ta United Nations Children's Fund (UNICEF) ajanga ashi.

"Nigeria nung ano maneni school tanur nem timtem agütsüba asoshi onok ain adoker aser jashir," ta UNICEF indang Nigeria representative, Peter Hawkins-i ashi.

Samar aliba tetsürtem rongnung ozü jala ana dena lir, ta tsürabur kati ashi.

"School tanur tetsür 300 shi samaogo ta onok dang school ketdangsürtemi ashiba rongnung ozü jala arishi küm 10 tain ka aser

küm 13 tain ka dena lir," ta tsürabur Nasiru Abdullahi-i osangbener dang ashi.

"Prangbong bena alirtem ya ayatirm sülen arua Zamfar nung tetsür kisüng azüngba school nung ghonda aika par teinyaktsü mapa inyaka liasü, ta yangji alirtemi ashir," ta Minna state nungi osangbener kati ashi.

"Item prangbong bena aliba teloki tanen makai amakba state tem rongnung ibai ka lir, kong rongsen meshitsü mechi tashiyim agi nisung apur, yimtsüngtem amaker... ibai linük north tsütsü nüburtemi anogoshi ajuruba tensa ka lir," ta paisa ashi.

Nigeria north tsütsü hopta ana majungdang tashiyim agi nisung pua bener aoba tain agi tanabuba lir.

Taoba hopta north-central Nigeria nung aliba Niger state kübok boarding school ka mejangjaba lendong agütsürtemi maka kaketshir ka tepset aser ano kaketshir 27 densema nisung 42 pua bener ao. Item nisungtem ya tang tashi mechioki lir.

December ita Kankara tesem nung aliba school ka nungi teburchanu 300 dak tema pua bener ao. Iba tesem ya Tir Muhammadu Buhari'er ki aliba Katsina state kübok lir.

Sorkar ketdangsürtem den jembishinüba sülen tanurtem ya chiok, saka iba tatalokba ya alima ajungai aja liasü.

# Brazil nung COVID agi asür nisung 250,000 jungogo

**Brasilia, Tsüklai/February 26 (Agencies):** Brazil nung novel coronavirus case mezüngbuba jangjateter küm ka lir iba linük nung COVID-19 tashidak agi asür nisung 250,000 alemogo, aser virus ya maneni prokshir, kong linük tesem ajungalen mozü agütsüba maparen junga metenzükte lir.

Tir Jair Bolsonaro, shibai linük nung virus nungi jenbutsi atema tenokdangba meratem agitsü memolung aser COVID-19 mozüa magitsü ta jembia

arur, pai virus nungi linük kumzüksü asoshi tim maparen meinyakba atema aitsür.

Alima nung COVID-19 agi nisung timtiba asüba linük, United States sülenbo Brazil ya lir, aser iba linük nung nisung million 10.3 dak tema iba tashidak agi menepba jangjatetogo. Coronavirus agi nisung timtiba menepa aliba linüktem rongnung United States aser India sülenbo Brazil ya alitsü.

Kanga mela menatepa aotsü akokba iba tashidak yagi

Brazil nung nisung 251,498 takum samatsüogo aser tesüiba ghonda 24 tsüngta nisung 1,541 asü, ta health ministry ajanga Brehostibar nikongdang ashi.

Brazil nung tensa tamajungba akumer amai lir, kechiaser iba linük nung coronavirus tabu tasen ka jangjateta lir, koba menatepa aotsü kanga agi temelaba, ta research agirtemi ashir. Taoba hopta ana tsüngda anogoshi Brazil nung coronavirus agi nisung 1,100 jungnüa asü.

(Maneni tapak 9 nung...)

# Central Mali nung sepai teku tepset

**Bandiagara, Tsüklai/February 26 (Agencies):** Central Mali nung Bandiagara jila anasa telungpur kanga longsoa aliba tesem ka anasa lendong ka ataloka sepai teku asü, ta mitkar ketdangsürtemi ashi.

Brehostibar aonung sepaitem aliba post ka amakba nung nisung ti asü, ta army aser yangji aliba ketdangsürtemi jembia liasü.

Iba lendong nung Mali sepai teku yiru aser parnok rongnung pongu kangasa mejungi yirua lir, ta mitkar tanishir kati ashi.

Yangji aliba ketdangsür katia mapang talangka khatapa liasü, ta ashi.

Mali nung separatist movement ka north tsütsü tenzüka rara agi linük tesem ajungalen asüng aser aangbo telongpur telok balalai linük central aser northern region tem amokbangtsü merangteper.

Sahel region nungi Burkina Faso aser Niger tashinung tensa kanga mejungi lir, kong telok balalai makamait tia nung aliba kin anishitsü meranger aser ano kin balala tsüngta meputepi lir.

2016 aser 2020 tsüngta lendong atalokba tali akum, aser linük asem nungya taoba küm nisung 4,000 shi tepset, kong 2016 küm nisung 770 shi tepseta liasü, ta United Nations-i ashir.

Sorkar anemertemi central Mali nung lendong agütsüba mapang aiben lenmang tezülen bomb yur pokdaktsür mesüra motorbike aser pickup nung arua azüdokshir jena aor.

Küm tenzüker iba region nung lendong tesashi aiben ataloka arur, kong lenmang tezülen bomb pokdaktsüba mapang Ivory Coast nungi United Nations peacekeepers pezü takum samaja liasü.



Hong Kong nung aliba community vaccine center ka nung nüburtem China indang Sinovac COVID-19 coronavirus mozü agitsü atatepa aliba noksa nung angur. Hong Kong nung Hokulbarnü nungi tenzüka COVID-19 mozü agütsür, kong nisung million 7.5 shi nem iba mozü angati agütsütsü sentong tenzüka lir.



## Redmi K40, Redmi K40 Pro aser K40 Pro+ sayaogo

**New Delhi, Tsüklai/February 26, 2021 (Agencies):** Xiaomi sub-brand Redmi-i Redmi K40 series indang flagship smartphone tem sayaba sangdongogo. China nung virtual ajanga sentong ka agiba mapang, Redmi K40, Redmi K40 Pro aser Redmi K40 Pro+ smartphone tem saya liasü.

Item smartphone asem rongnung, Redmi K40 nung Qualcomm indang Snapdragon 870 SoC aser Redmi K40 Pro o Redmi K40 Pro+ nungbo Qualcomm Snapdragon 888 chipset inoka yanglutsüogo. Redmi K40 series nungi Smartphone asempronlga nung 120Hz AMOLED display dena lir aser item device den RedmiBook Pro 14 aser RedmiBook Pro 15 laptop den Redmi AirDots 3 truly wireless earbuds sayaogo.

Redmi K40 6GB RAM + 128GB storage variant jenjang CNY 1,999 (sen 22,500), 8GB RAM + 128GB storage variant jenjang CNY 2,199 (sen 24,700) aser 8GB RAM + 256GB storage variant jenjang CNY 2,499 (sen 28,000) alitsü. Top-end 12GB RAM + 256GB storage variant jenjang CNY 2,699 (sen 30,400) asütsü. Iba smartphone ya Dreamland, Icy

White, aser Glossy Black nung angutsü.

Ano külen Redmi K40 Pro - 6GB RAM + 128GB storage variant jenjang CNY 2,799 (sen 31,500), 8GB RAM + 128GB storage variant CNY 2,999 (sen 33,800) aser 8GB RAM + 256GB storage variant jenjang CNY 3,299 (sen 37,000) asütsü. Ajisüaka, Redmi K40 Pro+ ya 12GB RAM + 256GB storage variant nungang angutsü aser iba variant jenjang CNY 3,699 (sen 41,600) alitsü. Redmi K40 series jelia mekaa ayutsü atema lapoktsüogo aser March 4 nungi ayoktsü.

Redmi K40 nung 6.67-inch full-HD+ E4 AMOLED display den 1,300 nits peak brightness, 120Hz refresh rate aser 360Hz touch sampling rate keta lir. Display nung aspect ratio ji 20:9 alitsü. Iba smartphone nung Qualcomm Snapdragon 870 chipset den 12GB LPDDR5 RAM aser 256GB UFS 3.1 storage angutsü, koba 4,520mAh battery ajanga nungittsü. Camera tsütsü reprangdangra, Redmi K40 nung triple rear camera set up angutsü, kong 48-megapixel Sony IMX582 primary shooter ka, 8-megapixel ultra-wide angle lens aser 5-megapixel

tertiary sensor den macro lens keta lir. Redmi K40 tejaklen 20-megapixel selfie shooter inoktsüogo.

Redmi K40 Pro nunga 6.67-inch full-HD+ E4 AMOLED display den 120Hz refresh rate aser 360Hz touch sampling rate inokja lir. Redmi K40 ya octa-core Qualcomm Snapdragon 888 chipset den 8GB RAM aser 256GB UFS 3.1 storage ajanga achaayangtsür. Iba Smartphone battery tasazük 4,520mAh unit alitsü aser 33W fast charging support asür. Camera atema, Redmi K40 Pro tesülen triple rear camera setup angutsü, kong 64-megapixel Sony IMX686 primary shooter, 8-megapixel ultra-wide angle lens aser 5-megapixel tertiary sensor dena lir.

Maneni, series nung temaba Redmi K40 Pro+ nunga Redmi K40 Pro ama Qualcomm Snapdragon 888 chipset aser 6.67-inch display den tanga feature kasa angutsü. Ajisüaka, Redmi K40 Pro+ nung 12GB RAM aser 256GB UFS 3.1 storage inoktsüogo. Camera tsütsü reprangdangra, Redmi K40 Pro+ nungbo 108-megapixel Samsung HM2 primary shooter angutsü aser tanünga camera feature tem Redmi K40 ama alitsü.

## Friendship High School, Chuchuyimlang SITUATION VACANT

1. Science teacher (for Secondary level)  
Qualification : Bachelor degree.  
Preference : B.ed / d.el.ed/ experience.  
Salary : 9k+

Resume may be submitted at the school office during office hours or may be mailed to friendshiphighschl@gmail.com /WhatsApp at 9612951891.

Shortlisted candidates will be called for interview.

For further details contact : 7005532660.

## Longleng nung metsüjang lema agütsü

**Longleng, Tsüklai/February 26, 2021 (TYO):** Fostering Climate Resilient Upland Farming System (FOCUS) Nagaland tawabangba kübok Longleng nung metsüjang lema agütsüba sentong ka agi. Iba maparen ya International Fund for Agricultural Development (IFAD) ajanga teyari agütsür.

FOCUS: IFAD, Longleng indang DAO aser DPM S. Yongchang Phom-i, 'food sector' nung tangar dak memetaloki pei sasa inyakteta peria alitsü asoshi aluyimertem

ajungshia liasü. Paisa aluyimertem dang, mongpu ka atemba sülen, aruya aliba mongpu atema metsüjangtem bendena ayutsü aser tsünüsembongtsü tajungba/timba adokdaksütsü atema 'crop cutting' inyakyim tendangtsüla ta aluyimertem dang ashi.

Iba project tenzükba mapang nungi aluyimer nungdakba asadanga Kharif aser Rabi metsüjang tajung agüja parnok maparen nung nungitba atema aluyimertemi project dang pelaba metetdaksü.

## NABARD-i NAGCC project semdang



Tuensang, Tsüklai/February 26, 2021: Hokolbarnü, NABARD den department balala nungi teshimtet nübu temi Phir Ahi aser Chungtor village, Longkhim Block nung teinyakdak aliba NAGCC project semdangba mapang tangokba noksa ka yangi angur.

**Tuensang, Tsüklai/February 26, 2021 (TYO):** Tang teinyakdak aliba NAGCC project atema, Hokolbarnü (26.02.2021) NABARD den Fisheries & Aquatic Resources Department aser Sericulture Department, Tuensang longjemer Phir Ahi aser Chungtor village, Longkhim Block semdangogo.

Iba project semdangba

mapang, item department tenüng nungi S. Amarjit Mokokchung, Rongsenkumzuk, DFO, Fisheries, Tuensang aser Longyangkumba, ASO, Sericulture, Tuensang den Department staffs aser NAGCC project indang Village Committee züngsemtem dena liasü, ta sangdong ka ajanga metetdaksü.

## Ryan Gosling-i 'The Actor' yanglutsü



**New York, Tsüklai/February 26, 2021 (Agencies):** 'Drive' nung tongti shilem agisang Ryan-i 'The Actor' nung shilem agiba den producer ama inyaktüsü. asütsü. Donald E. Westlake indang novel 'Memory' otsü kakat nung ajemdaker yanglutsü aliba film nung Ryan-i New York actor Paul Cole ama shilem agitsü.

Duke Johnson-i iba film direct asütsü aser project atema Stephen Cooney den külemi script zülutsüogo.

Iba project dak alaka, Hollywood icon Gosling-i motion picture balala nung inyaktüsü sentong lir aser item rongnung Netflix indang 'The Gray Man' dena lir, kong Ryan-i Chris Evans den külemi shilem agiba angutsü.

Osang ajanga angazükba agi, Phil Lord aser Chris Miller nati Ryan Gosling indang 'Project Hail Mary' yanglutsü.

Andy Weir-i züluba novel nung ajemdaker yanglutsü aliba film nung 'La La Land' star Ryan-i shilem agiba den produce asütsü. 'Project Hail Mary' ya takim Random House ajanga adoktsü aser iba sülen film atema maparen tenzüktsü imlar.

## Dimapur Airport nung 'air cargo...' (Tapak 1 nungi...)



"Tanga airport tem ama masü saka Dimapur Airport-i melamela raksaba agri & allied items nung temolung agütsütsü, kechiyong Nagaland-i agri sectors mapa inyaktüsü lenmang sadema lir. Nisungtemi iba facility amshitsü aser state indang rongsenkettsüng jenjang tajungba kümdaksütsü ayongzük" ta Director, M Zhimo-isa metetdaksü.

Sentong nung Agriculture Production Commissioner, Y Kikheto Sema-ia Nagaland nem

agri & allied maparen inyaktüsü moaja lir ta ashi.

"Asen state asoshi tebilemstü kaji sobaliba nungi tekong lu ayimba ya ka lir anungji asenoki integrated settled farming merangtsüla" ta paisa ashi.

Nagaland state anguba sülen küm 57 tashi nung district ajak nung soil testing lab maliasü saka 2020 & 2021 tsüngda ibaji inyaktetogo. Tanabuba nung Ministry of Civil Aviation nungi security clearance nguogo, ta paisa ashi.

Iba sentong nung Commissioner & Secretary, Horticulture, Anenla T Sato, IAS-ia o jembidang Airport authority, Dimapur aser talisa Director, M. Zhimo dang pelaba metetdaksü.

Sentong nung mendenji Director & Mission Director (MIDH) of Horticulture, R. Elithung Lotha liasü aser DGM Cargo NER, AAI tenüng nung Nazeer AS Basha, Director, AAI Dimapur Airport-i cargo operation indang SOPs metetdaksü.

## Brazil nung COVID agi asür nisung... (Tapak 8 nungi...)

"Virus ta tazüokba makai menatepa aor," ta Christovam Barcellos-i ashi. Christovam Barcellos ya iba linük nung sorkari senotsü teyari agütsüba Fiocruz biomedical institute nung ketdangsur ka lir, kong Brazil asoshi lemzüktsüba AstraZeneca COVID-19 yanglur.

Brazil nung tang 'second plateau' ajangshiba mapang lir. Ibai wave tanabuba masü, kechiaser hopta pongu dak tema anogoshi nisung 1,000 asür," ta pai ashi.

Virus ya tang Brazil nung yimitem ajanga tali menashir,

aser iba den yarisema tenokdangba kecha mali, anungi Brazil nungertem sadok-sayima senzür, ta ketdangsurtemi ashi.

Amazonas state nungi coronavirus tabu tasenba prokshiba ya ajanga alima tesem ajungalen aoksatepdaksü aser Brazil nungertem linük balala nung senzütsü teimla alirtem molungsoa magizük. Iba virus tabu tasenba ya Brazil kübok state tajeмба agi 17nung jangjatetogo, ta Health Ministry ajanga ashi.

Kanga meilongi aser

yimtenren tsütsü makmakshimaka Brazil nung COVID-19 mozü agütsü tenzükogo aser nisung million 210 dak tema aliba linük nung nisung million 7.5 nem iba mozü ya agütsüogo.

China indang Sinovac Biotech ajanga yangluba COVID-19 mozü ya tang Brazil nung virus ajemdaksütsü asoshi hadir tongtiba lir, koba UK aser South Africa nung jangjatetba virus asoshia tajung, ta ashir.

Brazil nung tang tashinung iba mozü ya doses million 16 dang agizüka lir.



Gulmarg, Tsüklai/February 26, 2021: Hokolbarnü, Gulmarg indang ski resort kübok 2buba Khelo India National Winter Games asayamung lapokba sentong nung shilem agitsüpurtem march-past agiba mapang, Lt Governor Manoj Sinha (tiyong) aser Union Sports Minister Kiren Rejju (abilen) nati asayartem teka madena pela agizükba yangi angur.

## World Test C/ship (WTC) rankings nung India temaba jenjang tongtetogo

**New Delhi, Tsüklai/February 26, 2021 (Agencies):** Motera, Ahmedabad nung Brehostibarnü Narendra Modi Stadium nung Test tasembuba indang mezüing anogo ana nung India team-i England madak takok anguba sülen, World Test Championship points table nung India tebur cricket team temaba jenjang tongtetogo.

Iba pink ball Test asayamung nung India-i wicket 10 agi England kokogo.

India, shirnok Chennai nung England madak run 317 agi akokba den 69.7 percentage of points (PCT), 460 aggregate points aser New Zealand tesülen jenjang tanabuba nung aliba sülen, parnok 71 PCT agi Kiwis ajatetogo.

World Test Championship indang final tongtettsü atema England team-i tang India den asaya pezü Tests series 3-1 agi akoktsüla, saka parnok Test tasembuba menoktetba ajanga June 18 nungi 22, 2021 final nung New Zealand den masayatetsü.

Test tasembuba nung England tamakok anguba sülen,

point table nung parnok 64.1 percentage points tashi aluogo, koba India-i 71 percentage points ngua temaba jenjang ajanzükta lir. New Zealand team-i 70 percentage points tongteta final nung asayatsü jenjang ka ajanzükta.

WTC Point Table nung Australia team tejakdang alitsü atema India-i Test pezübuba (Tatembangbuba Test) ya akoktsüla mesüra draw asütsü nüngdaker. Tang Test ranking nung Australia team 69.2 percentage points ngua jenjang tasembuba nung lir.

Motera Test (Tasembuba Test) indang tanünübuba anogo nung England team tanaben batting tsütsü kanga mejungi asaya aser tanabuba innings nunga run 81 nung asayar ajak out asüba sülen, India-i takok angutsü atema run 49 nüngdaka aküm. India atema Rohit Sharma aser Shubman Gill nati over 7.4 nung iba alizüing tongtet aser iba series 2-1 agi tejakdang akümtsü atema parnok England madak wicket 10 agi takok angu.

Iba Test tasembuba nung

India atema spin bowler temi wicket 19 agi. Kasa asaya mezüing innings nung Axar Patel-i wicket 6 agiba sülen tanabuba innings nunga pai run 32 agüja wicket pungo agiba atema Man of the Match award agütsü. Ano külen, spinner takotet, Ravichandran Ashwin-ia test tasembuba nung wicket tenet agia pai 400 Test wickets alizüing tongtet. Iba den külemi Test wicket 400 tashi kara tongteter India nungerrongnung Ashwin mezüing kümogo.

Tasembuba Test nung Washington Sundar-ia ball aontsü maongka angu aser pai ball pezübuba nung James Anderson out sütsü.

Anogo pungo test asaya ka anogo ana nungdang tembangadokba ya Test Cricket atema kangarabo jangratemsüka masü. Motera pitch tasenba, kong 'pink ball' ondaker atuba yimya balala sayu, iba ya asadangshitsü. behaved inconsistently, will be put under the scanner. Ajisüaka, Rohit Sharma-i iba pitch ya cricket masayatetsüsa mejungrabo masü, ta ashi.

## Yusuf Pathan cricket asaya nungi anener

**New Delhi, Tsüklai/February 26, 2021 (Agencies):** Hokolbarnü (26.02.2021) Yusuf Pathan-i la cricket asaya ajak nungi anenba sangdongogo.

2007 aser 2012 küm tsüingda India team atema pai ODIs 57 aser T20Is 22 asayaogo. Tongtibang cricket asayamung ana - 2007 T20 World Cup aser 2011 ODI World Cup nung Yusuf-i shilem agiogo aser India team-i asayamung anaprongla takok angu.

"Ni Cricket asaya ajak nungi anenba sangdonger. Cricket wadang nung ajemoka asaya arudang lenmang balala ajanga nungita aser yariba atema adianutem, medemertem, fans, team pur aser linük ajunga nung nüburttem dang temulung

taroktiba nungi ni pelaba metetdaksür. Tarutsü anogotem nunga nenoki ni ajungmesotsü imlar," ta Yusuf-i lemsatet.

Pathan-i cricket career nung International dak alaka, domestic nunga pai Baroda atema asayaogo. IPL nunga Yusuf-i Kolkata Knight Riders aser Rajasthan Royals atema takok ngua shilem agiogo. IPL nung pai asaya 174 nung shilem agiogo. IPL takok marok asem tashi takok angur Cricket asayar rongnung pa mezüing alitsü.

Tesüiba küm 10 tejakdang IPL 2010 season nung Mumbai Indians den asayadang Yusuf Pathan-i ball 37 nung century yanglua lir, koba IPL asayamung putiotsü nung takaratiba century tongteter

rongnung pa tanabuba aser India nungerrongnung iba jenjang ajanzükta nungnung pa mezüing alitsü. 2019 küm Sunrisers Hyderabad atema Yusuf-i tesüsa shilem agiogo, saka 2020 season matongdang pai iba franchise toktsü.

T20I strike-rate timtiba angur India nungerrongnung Cricket asayar rongnung pa tanabuba alitsü.

Maneni, aruya aliba Road Safety World Series nung Yusuf Pathan-i India Legends tenüing nungi asayatsü terenemba lir. Iba asayamung nung pai taoba mapang külem asayar talisa Sachin Tendulkar, Virender Sehwag, Yuvraj Singh, Zaheer Khan, Ajit Agarkar, aser pa adianu Irfan Pathan nungerrongnung külemi shilem agitsü.

## 29buba Inter Club Cricket: Zungamedem aser Titans CC na quarter final-i iogo

**Dimapur, Tsüklai/February 26, 2021 (TYO):** Tang asaya aliba MDCA Inter Club Cricket Tournament nung, Hokolbarnü Zungamedem aser Titans CC nati pei pei tata asaya koka asayamung quarter final tongogo.

Mezüing asaya nung A&K Cricket Fraternity-i over 17 nung run 132 yanglu aser parnok asayar 4 out süadok. Neehal-i run 45 yanglua liasü. Züingamedem nungi Temjentoshi, Nchembemo aser Funit nungeri wicket ka ka agi.

Tanabuba innings nung Zungamedem nungi Imkum-i ball 44 nung run 62 yanglu aser over 16.4 nung wicket 8 out süa parnok iba asaya koktet. A&K atema Neehal-i wicket asem (3/27) out sütsü aser iba

asayamung nung wicket timtiba agir rongnung Neehal kümogo. Zungamedem-i iba asaya koka parnok quarter-i iogo. Kasa mapang, A&K Cricket Fraternity-i asaya makokyongjia, Pool nung parnok Net Run Rate timba lir. Iba Pool nung team asempronglai asaya ka ka koka lir.

Kasa anogo asaya tanga ka nung, 'Walk Over' ajanga Titans-i asaya akok. Tang, Titans CC aser Skylark CC naprongla taruba round-i iogo. Honibarnü, Skylark CC aser Titans tsüingda tatembangbuba League asaya sülen pool nung temaba team shimtsü.

**Tanü asaya yamai alitsü:**

10:00 AM - Titans CC Vs Skylark CC

## Europa League: Manchester United last 16-i iogo

**Manchester, Tsüklai/February 26, 2021 (Agencies):** Brehostibarnü, Europa League round of 32 nung Manchester United aser Real Sociedad na tsüingda goal 0-0 - draw nung tembangba sülen United-i 4-0 aggregate nung takok ngua Europa league last 16 tongogo.

Deobarnü Premier League nung Chelsea den asayatsü aliba tejakdang, United manager Ole Gunnar Solskjaer-i striker Marcus Rashford aser defender Harry Maguire naprongla asayadaksü.

Iba asaya nung United pur anüalemba nungi saksalema asaya metenzükdang, minute 13buba nung Sociedad-i penalty ka metsütsü maongka angu, saka Mikel Oyarzabal-i goal post adena ball ji metsüdok aser United nungi Bruno Fernandes-i goal ka idaktsütsü merangdang saka crossbar nungang ondak.

Break sülen tanabuba half nung United substitute Axel Tuanzebe-i metsüba goal ka magizükba sülen Sociedad atema Modibo Sagnan kolak agi goal ka tongoktsütsü merangdang, saka goal post nungang tepdak. Victor Lindelof-i asaya yimya dak mapet benschia Jon Bautista alangdaksüba ajanga iba goal magizük.

Iba asaya tanabuba half nung asayar melentepdang Fernandes melen Rashford maopu telungi aita asaya, saka

United-i goal ka danga meinoktsütet aser parnok Sociedad nem goal ka danga idaktsütsü maongka magütsü asaya tembangadok.

Kasa asayamung asayamung asayamung tanga ka nung Pierre-Emerick Aubameyang teyari ajanga Arsenal last 16 tongogo. Iba asaya nung Arsenal aser Benfica na tsüingda goal 2-2 aliba mapang, asaya tatemlen Aubameyang-i goal ka idakja Arsenal-i goal 3-2 aser 4-3 aggregate nung asaya koka Europa League indang last 16 tongogo.

Athens nung telok ana tsüingda asaya liasü, kong goal 1-1 nung mezüing half tembanger sülen Dani Ceballos-i aibelenba maongka agia Rafa Silva-i minute 61buba nung goal ka idakja Benfica pur goal 2-1 agi Arsenal tejakdang kumadok. Last 16 nung maneni shilem agitsü atema Arsenal-ia goal ana nüngdaka aküm.

Ajisüaka, tatsüka dang lir Kieran Tierney-i minute 67buba nung goal ka idaktsüba ajanga Arsenal nem teimla agütsü aser asaya atemtsü lia minute 86buba nung Arsenal atema mezüing goal idaktsüsang Aubameyang-i pa indang goal tanabuba idakja Arsenal pur Last 16 tongtettsü lenmang sadema lapoktsü.

Iba asaya atemtsü lia Benfica-i goal tasembuba idaktsütsü merangdang saka goal post nung ondak.

## BILEMDANGANG

"Tuluri tilar machiteter saka tilaribo tular ulubaji achiteter."